

## Gōa-kok ê Góeh-niû Kám-ū-ia<sup>n</sup> Khah Í<sup>n</sup>?

Ang Liông-kiàn

Lâng lóng teh kóng Gōa-kok ê góeh-niû khah súi koh khah í<sup>n</sup>. Chit-kù òe tī góa sè-hàn ê sí, sí-siông thia<sup>n</sup>-tiòh sin-pi<sup>n</sup> ê tōa-lâng lóng án-ne teh kóng, him-siān tī gōa-kok ê seng-òah, gōa-kok ê mih-kiā<sup>n</sup>. Góa mā sī kāng-khóan siū-tiòh chit-chióng chông-iū<sup>n</sup> ê sim-lí, tī sè-hàn sí tiòh chhim-chhim ìn tī góa ê náu-hái lái.

Tī góa tōa-hàn í-āu, chit-chióng ê siū<sup>n</sup>-hoat iáu-koh it-tit tī góa ê náu-hái lái, bô hoat-tō kā pàng bē-kì, sí-siông teh siū<sup>n</sup>, iōng siá<sup>n</sup>-mih hong-hoat, chia<sup>n</sup> ē-tàng chhut-kok kiau lâng pí-phēng.

Lâng kóng “bô hí, hê mā hó”, só-í góa chia<sup>n</sup> lái kàu lí-khui Tâi-oan chia<sup>n</sup>-nih hng ê Àu-Tē-Lī (*Austria*) chit-ê só-chāi. Chit-ê só-chāi thó-tē chin tōa, chin-chin chiá<sup>n</sup>-chiá<sup>n</sup> ê Àu-Tē-Lī ê jîn-kháu chin chió, lóng sī khò gōa-lái ê bîn-chók jîn-kháu lái hū-chhi<sup>n</sup> chit-ê kok-ka, tân-sī in ka-kī kok-ka ê lâng, hui-siông pài-thiat gōa-kok-lâng, chin-chiá<sup>n</sup> sī “Pûi-chúi bô hiòng gōa-kháu lâu, chhiú-óan bô hiòng gōa-kháu chhun”, chit-kù òe iōng tī in ê

seng-khu téng, sit-chāi bô kòe-hūn. Tī chia ê gōa-kok lâng lóng siū-tiòh in ê khi-hū, iōng chióng-chióng ê lí-iū, phì-jū in ê bûn-hòa, pài-thiat chióng-chók ê bûn-tê, pài-thiat tī hng-hng ê mng-gōa, hō lâng bô hoat-tō seng-chûn, bô hoat-tō chìn-jíp in ê siā-hōe.

Góa mā sī kāng-khóan bô lē-gōa, siū-tiòh chit-khóan bô pêng-téng ê thāi-gū, hō góa tui him-siān gōa-kok ê seng-òah chiām-chiām tām-hòa, múi l-pái khò<sup>n</sup>-tiòh góeh-niû sí, lóng kám-kak sī l-ê khih-kak ê góeh-niû, hō lâng koh su-liām khí lán ka-kī chhù-lái ê góeh-niû, mā chin-chiá<sup>n</sup> hiah-nih súi-tang-tang. Chhin-chhiū<sup>n</sup> lán Tâi-oan chit-ê chia<sup>n</sup> sió ê hái-tó, tui kòe-khì kàu hiān-chāi lóng siū-tiòh gōa-pang lâng ê thóng-tī ap-pek, lóng bô chhin-chhiū<sup>n</sup> in Àu-Tī-Lī ê láu-peh-sè<sup>n</sup> hiah-nih thòan-kiat, háp-kûn, chīn in ka-kī ê lèk-liōng, hù-chhut in ê it-seng.